

COMIENZO DI DRUMBAND CU E RITMO YAMA AWE "ASAMBEHO"

(Saca for di documentacion di carnaval di Juby Naar)

Ultimo dos dianan por a tende comentarionan na radio riba e ritmo Asambeho, y con el a cuminza, unda el a cuminza etc. y mi por a ripara cu hopi ta papia pero no tin e historia exacto tampoco. For di e documentacionnan cu mi tin riba esaki, mi por publica un parti awe relaciona cu e comienzo y agrega algo mas di e drumbandnan.

Na Aruba ta ser papia di brassband, pero locual nos ta hayando den parada no ta brassband, sino drum band.

Brassband manera e tabata conoci den añanan 50 (mi ta pensa aki riba **Excelsior Brassband** por ehemplo) ta e agrupacion pero cu e brass dilanti, sigui pa e drumnan.

Drumbandnan tin e drum nan dilanti y cu e brass parti patras.

Ta ser bisa cu drumband a cuminza na YMCA di un grupo di mucha cu a bini cu un ritmo nobo etc. pa sigui e historia cu ta ser ripiti.

Esaki no ta verdad tampoco.

Si mi tin cu bay back, mi por bisa cu ta den año 1964 caba, **Sam Hodge**, tabata tin un banda chiquito ta entrena den **NWIWA club**, conoci como **St. Maarten Club** na San Nicolas.

Cu mi por corda, **Bulto Gibbs** tabata un di su saxophonistanan cu a cuminza cune, tambe e trompetista di faam **Lovell**, e trompetista como mucha ainda, **Boy Boy Richards** cu tabata tin un braza.

Como joven nos tabata sali di entrenamiento di tennis, baseball, of atletismo di Lago Sport park pa bay sinta scucha e drumband.

E drumnan tabata locual e muchanan tabata tin e tempo ey y nada di gaba pa medio di sponsor of donacion etc.

Theo Latig tabata riba e drum baho, **Walter Spearr** tabata e maestro di drum hunto cu **Oily**.

Tabata tin algun mas cu mi no ta corda nan number actualmente.

Den año 1966, e año prome cu nan a drenta parada di carnaval, nan a muda pa YMCA.

Pakico?

Pasobra Lago Community School a cera y Lago a haci donacion na YMCA di un set completo di drum y aki lesnan a ser duna den otro esfera y ambiente.

Aki ta unda **Arnold Beyde** a bin cay aden como trompetista yudando e muchanan y e grupo hunto cu **Sam y Bulto** cu tabata e grandinan dirigiendo e jovennan.

Tabata tin hende cu a yama e drumband aki e Esso drumband pero esaki tabata pa motibo cu riba e drumnan tabata tin emblema di Esso

como cu nan a ser regala di parti di e compania di Esso. Ta kita no a kita e emblema.

Na YMCA tambe tabata unda e placer di scucha libremente a bay perdi, pasobra pastoor di San Nicolas no tabata kier pa catoliconan drenta YMCA tampoco.

YMCA tabata wordo mira e tempo ey ainda como un lugar pa protestantnan y caminda catolico no mag mescla. Toch hopi joven catolico tabata bay scucha e drumband cu su ritmo cadente "afro" mescla cu e ritmo di "marching band".

Na 1967 como president di **Goldfinger Fanclub na Bonaire Club**, despues cu nos a caba di traha e carosa cu su dede di oro, tabata tin mester di un grupo musical pa toca den parada, y aki ta unda mi a aserca e drumband cu a ser paga 50 florin pa parada y a bin resulta "e **promé BRASSBAND**" den parada di carnaval.

Cerca e gruponan di awe, no ta haya e "roll drum" mas caminda e tocador ta keda lora usando su pols den mes sistema cu un tocador di "first pan" y tambe di "second pan" di steelband ta "roll" riba notanan.

Di e bassdrum ta perdi tambe e "double beat" cu den **D2U 365** so ta haya de vez en cuando ainda.

Locual a bay perdi den drumband ta e "steel". E riem di wiel di auto.

Esaki tambe a kita parti di e originalidad.

Awe nos ta mira nan ta toca wiri na su lugar, locual no ta e cos.

E harmonia di e musica tambe a bay perdi.

E drumband di **Beyde y Hodge** tabata tin cada tromp tocando otro tono. Awe bo ta haya 10 trompet y tur tocando e mes cos na mes tono. Den Macarena ta haya e drumnan tocando casi e mes tono di e trompetnan sin e variacion.

E "metronomo" (dunando tanto sla pa bara, mas o menos 80 pa 100 pulso) por ser compara cu esun di steelband y esaki ta e ritmo riba cual e hendenan ta marcha of baila riba e roadmarch.

E ritmo ta segun e metronomo basa riba marching band y steelband.

Mirando grandura di algun drumband awe, mi lo por bisa compara cu e prome nan, di YMCA y di **Rufo Odor All Stars**, cu por cohe e brassbandnan grandi di awe parti nan na dos, y nan ta duna e mes sonido cu un brassband di 30 año pasa y no ta baha nada pa e sonido di 30 pa 40 tocador di awe.

E brassbandnan di principio tabata saca e sonido segun harmonia di instrumentonan y awe segun cantidad di instrumento.